



COKLAT yang dijual Noorazeaty Mohd. Khalif mendapat sambutan.

Raih RM15,000 sebulan jual coklat

KUALA LUMPUR 29 April - Walaupun baru menceburkan diri dalam bidang keusahawanan dua tahun lalu, pelajar tahun akhir Universiti Putra Malaysia, Noorazeaty Mohd. Khalif, 25, kini meraih pendapatan sebanyak RM15,000 sebulan dengan menjual coklat.

Noorazeaty berkata, kini dia mempunyai seramai lima pekerja dan berhasrat untuk mengembangkan lagi perniagaannya selepas tamat pengajian nanti.

“Dari satu produk, kini

saya sudah ada lima produk coklat dalam lingkungan harga RM8.90 hingga RM17.

“Kelima-lima produk saya adalah berasaskan coklat gelap kerana saya tidak mahu bersaing dengan syarikat coklat susu terkemuka seperti Cadbury, Kit Kat dan lain-lain,” katanya kepada pemberita dalam siri jelajah Program Professional Training and Education for Growing Entrepreneurs (PROTÉGÉ) di UPM baru-baru ini.

Tambah Noorazeaty, dia berharap mahasiswa yang ingin

menceburkan diri dalam bidang keusahawanan tidak akan patah semangat atau rasa terkekang dengan masalah kewangan.

“Banyakkan serta program seperti PROTÉGÉ untuk tahu maklumat mengenai keusahawanan. Kerajaan banyak menyediakan dana untuk peniaga-peniaga muda macam kami cuma perlu bijak cari peluang dan sediakan dokumentasi yang diperlukan.

“Apa yang paling penting, perlu ada minat mendalam dan tidak takut dengan cabaran.

Perlu juga pandai dalam membahagikan masa di antara pembelajaran dan perniagaan kerana kedua-duanya sama penting.

“Jangan mudah putus asa kerana dalam perniagaan, tidak selalunya indah,” katanya.

Menurut Noorazeaty dia berharap Kementerian Pembangunan Usahawan dapat membawanya menembusi pasaran luar negara.

“Selain itu saya juga berhasrat untuk membuka kilang coklat satu hari nanti,” katanya.